

Dé dles vocaziuns: en domegna ai 17 d'aorí vegnel tigní por dōta la Val Badia na **prozesciun por perié do vocaziuns**; an peia ia ales 14:00 dala dljia de Badia demez por jí sō Oies, olá che al sará na funziun. Düc é bel enviés!

Ocio - pelegrinaje dles Eres en Jênn, sabeda ai 16 d'aorí: al ven lascé alessi che al é da se prenoté al ☎ 0471 839842 y che la coriera peia ia ales 12:10 da Colfosch.

Oraziun da Taizé: la proscima oraziun de Taizé ven tignida en vendres ai 15 d'aorí ales 20:00 tla capela a Oies. Al se trata de en n'ora olá ch'al ven perié, medité y cianté en forma de Taizé. Düc é der bel enviés a tó pert.

Pflege das Leben! Über die Krankheit hinaus dem Leben in die Augen schauen: referat con don Paolo Renner en dedolōnesc ai 12 d'aorí ales 15:00 te Ciasa de Palsa a San Martin sora le ciaré dla vita y le ciaré bun de se enstesc. Por avei la forza vigne de danō por sté adōm ales porsones encer nos ia, ince por cheres co adora assistenza. Nosc edl dess jí no tan sōn le resultat, mo sōn le sosten che i ti dun y sōn le tru co ven fat deboriada. Düc é der bel enviés.

Biblioteca: la biblioteca "Angelo Trebo" y le Zenter Families Mareo organiseia na sera da s'la cunté por ingleje, en jōbia ai 14 de aorí ales 20:00, te biblioteca d'Al Plan.

Le Stat Islamich (IS): le consei de formaziun de Badia organiseia en jōbia ai 14 d'aorí ales 20:00 tla Ciasa J.B. Runcher a Badia na sera de informaziun sora l'IS (Stat Islamich). Curt Covi da Sanciana é n espert de terorism co laora tal istitut por la segurezza politica tl'Universitè de Kiel. Al nes spligará desche al é gnü a s'al dé le Stat Islamic, ciodiche l'IS ciafa tres plü sosten dai foreign fighters, ci consequenzes che l'IS pó avei por nos. L'espert ciarará da splighé la storia dai ultimi 10 agn tla Siria-Irak-Iran. Present sará ince siur degan laco Willeit co tolará posizium sōn la cuestiun dal Islam. La sera ven moderada da Diego Clara.

Curs de pröm aiüt - ci che an dess sei por salvé la vita: le cors ven tigní en vendres ai 15 d'aorí dales 18:00 ales 22:00 tal Istitut Ladin a San Martin. Ai partezipanc ti vegnel ensigné la teoria y la pratica dal pröm aiüt y les normes de reanimaziun. I partezipanc ciarará n atestat de partezipaziun.

Prejentaziun: le Museum Ladin Ciastel de Tor envieia ala presentaziun dal liber "Catarina Lanz" de Lois Craffonara y Helga Dorsch en sabeda ai 16 d'aorí ales 17:00 tal salf dles manifestaziuns d'Al Plan de Mareo. La moderaziun é de Diego Clara con l'acompagnamont musical dla Musiga d'Al Plan.

Döt le bun a: Maria Paolina Brandlechner, *Ciasa de Palsa* * 10.04.1925
Paola Maria Palfrader * 10.04.1933
Teresa Willeit Irsara, *Badia* * 11.04.1941
Maria Anna Ellecosta, *Trens* * 12.04.1936
nosc Papa emerité Benedet XVI. * 16.04.1927
y a düc chi co á santennom y complesc i agn cōst'edema

Impressum: Ploania d'La Pli; redaziun Franz Rigo y Edith Willeit
Comunicaziuns cina al dedemesaledema sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploian: Signor Heinrich Perathoner
E-mail: ploania@gmx.net

Calogna Al Plan: 0474 501006
Radio de Ploania: 93,00 Mhz

UNITÉ PASTORALA



VAL BADIA
www.unitepastorala.org

Ann C

10.04.2016 - Terza domegna de Pasca

n. 20

La verité dla Pasca nes dá coraji

☞ St.Ap 5, 27b–32.40b–41 | Rev 5, 11–14 | Jan 21, 1–19

Dal Vangelo do San Jan:

[...] Spo éσαι piés ia y fora y é jüs tla barca. Mo en che net ne n'ái pié nia. ⁴Canch'al gnea belo dé, ea Gejú sōn spona. I discepei endere ne sâ nia ch'al ea Gejú. ⁵Gejú ti á dit: Mi mituns, ne n'eise nia da mangé? Ai ti á respognü: Na. ⁶Mo el ti á dit: Sciürede fora la rei dala pert derta dla barca, y i abinareis val'. Ai á sciüredé fora la rei y n'ea nia plü bogn da la trá endô ete, tan plena de pesc éra. ⁷Danló ti á le discepul, a chel che Gejú ti oreá bun, dit a Pire: Al é le Signur! Canche Sciomun Pire á aldí, ch'al ea le Signur, s'ál ciolé ados le quant da sora ia, deach'al ea desnü y é salté tal lé. ⁸I atrí discepei ea gnüs do con la barca tirenn do la rei con i pesc laete, deache ai n'ea pō nia dalunc dala spona, ma encer duiciont brac. ⁹Canch'ai ea spo jüs sōn tera frema, ái odü ia por tera n fū de boreis y lassora pesc y pan. ¹⁰Gejú ti á dit: Portédenen ca de chi pesc ch'i eis der pié. ¹¹Danló é Sciomun Pire jü y á trat la rei fora sōn spona. Ara ea emplida de cionticincantetrei de gragn pesc, y scemia ch'al n'ea tan trec, ne se scarzâ la rei nia. [...]


I ponsun do

Val iade oresson la dé sō: i s'án proé, i án fat döt ci ch'ara jea, mo i n'án empó arjunt nia – al pō por nia proé ciamó en iade. Döt atramonter sona l'ordinn de Gejú: "Sciürede ciamó en iade fora les reis!" Cōsc ô dí: ince sc'i eis belo proé döt, proéde ciamó en iade. Deache i sán dal amur y dal fistide de Chelbeldio, ciafunse coraje da proé endô danö.

I periun

Beldio, to Fi rosserí s'acompaneia. Deidesse vire vigne de do cōsta fede pascala. Por Crist, nosc Signur.

Wilhelm Egger "Sonntagsbibel"



☞ Letöres dla Cuarta domegna de Pasca:

St.Ap 13, 14.43b–52 | Rev 7, 9.14b–17 | Jan 10, 27–30

Edema liturgica dai 10.04. ai 17.04.2016

DOM 10.	Terza domegna de Pasca Domegna de San Ciascian y San Vigile	Engelbert, Hulda, Magdalena G.
08:30	gran messa por dōta la ploania <i>oferta por l'Universitè catolica de Milan</i>	
14:00 10:00	funziun dal Bato de Ines Ploner s.m. a Al Plan	
Lön 11. 07:20	Stanislaus, Gemma Galgani, Filip s.m. a Al Plan	
Ded 12. 07:30	Zeno, Herta, Julius, Constantin s.m. por +ti Jep y Rosa Ellecosta, Lüchesc s.m. por +ti dla familia de Thomas y Maria Rubatscher, Longega	
Dem 13. 18:00	Martin I., Ida s.m. a Al Plan	
Jöb 14. 19:30	Valerian, Hadwig, Lidwina, Erna s.m. por +ti Jan y Regina Ellecosta, Stifler s.m. por + Maria Ellecosta ved. Erardi, Longega s.m. por + Vinzenz Pedevilla, Bornech	
Ven 15. 07:10	Hunna, Waltmann s.m. a Al Plan	
Sab 16. 07:30 18:00	Bernardette Soubirous, Benedikt Josef s.m. por + Maria Willeit, Balsan s.m. por +ti Lois Pedevilla y Verbene, Soröa s.m. prefestia a Al Plan	
DOM 17.	Cuarta domegna de Pasca Dé mondial d'oraziun por les vocaziuns	Eberhard, Rudolf, Max Josef
08:30	gran messa por dōta la ploania <i>oferta por i debojügnis dla ploania</i>	
10:00	s.m. a Al Plan	
► 14:00	prozesciun da Badia a Oies por perié do vocaziuns	
<i>ampola:</i>	por fam. Ritsch, Tomele da Rara	
<i>ministronc:</i>	► da doman y domegna: Samuel Rigo y Thomas Ellecosta ► da sera y domegna: Veronika Konrater y Federica Ellemunter	
<i>i recordun:</i>	Germana Lanz Pezzei, Schweiz	+ 10.04.2014



Iubileo Straordinar dla Misericordia: 8.12.2015 – 20.11.2016 (7)

Ties paraboles co baia dla misericordia reveleia Gejú la natöra de Chelbeldio desco chera de n Pere co ne la dá mai sö cina che al ne n'á pordené le picé y tut demez la refodanza con compasciun y misericordia. De cōstes paraboles nen conesciunse dandadöt trei: chera dla biescia pordüda y dla moneda endo cialada, y chera dal pere y sü dui mituns (Lc 15,1-32). Cōstes paraboles nes prejenteia n Dio plen de ligreza, dandadöt canche al pordona. Te cōstes cialfunse le nojel dal Vangelo y de nosta fede, deache la misericordia ven presentada desco che forza co supereia döt, co emplesc le cör d'amur y co consoleia con le pordonn.

Da en n'atra parabola podunse trá fora en ensegnamont por nosta vita da cristian. Provoché da Pire con la domanda, tan de iadi che an dess pordené, respogn Gejú: "Nia set iadi, mo setantesset iadi," y al ti cunta la parabola dal sorvidú zonza cör. (i dauriun sö Mateo 18, 21–35).

Te cōsta parabola cialfunse en ensegnamont der sterch ince por nos. Gejú nes dij che la misericordia n'é nia ma na carateristica dal operé de Chelbeldio, mo ara é ince n criter da chel ch'an pó odei che co é sü der' fīs. Cōsc ô dí che i sun cherdés a vire la misericordia, deache a nos por pröms él gnü scinché misericordia. Ester bogn da pordené le tort co nes é gnü fat é l'espresciun plü tlera dal amur misericordius y é porchel por nos cristiagn n imperatif da chel che i ne podun nia se trá sot fora. Tan rio che al é entres endô da pordené! Empó é le pordonn chel stromont co é gnü motü te nostes mans debles por cialé la pêsc te nosc cör. Lascé tomé senn, paronc, violenza y vendeta é condiziun fundamentala por na vita encontonta y fortunada. I orun porchel se tó a cör la racomanaziun de San Paul: "Le soredl ne dess nia jí do jö sora osc senn!" Y dandadöt orunse ti meter averda ala parora de Gejú, co a orü che la misericordia sii n ideal de vita y n criter de credibilitè por nosta fede. "Beac i misericordiusc deache ai cialará misericordia" (Mt 5,7) é la beatitudina da chera che i désson se lascé ispiré y acompagné te cōsc Ann Sant.



Vita de ploania y de paisc



"I te cherdi con to ennom" dij le Signur.

La ploania d'La Pli tol sö con ligreza te söa comunité **Ines Ploner** (Flô) y ti fej les miús aodanzas ai geniturs Michael y Giulia: che Ines pói cresce tla fede, vire tla speranza y sperimenté l'amur de Chelbeldio y dla joint.

- **Uniuns dles Eres:** al ven chirí fomenes co sorantól le sorvisc da **jí a porté;** cheres co se metess a disposiziun é periades da se lascé adentene pa Veronica.
- **Schira Jonila y i Ministronc dla Val Badia:** por düc i grups dla Val Badia vegnel motü da jí en domegna **ai 12 de jügn n iade a Gardaland.** Chi co é enteressés cialfa te dljia sön i pici altês na plata con les informaziuns y le formular por se scrí ete. L'autorisaziun pón dé jö a Marlies o a Manuela.
- **KVW:** le KVW organiseia en **domegna 10 d'aorí** do messa te scora en picio **marcé dai pöresc.** Ci ch'an tira ete i ven dé ai Ministronc y ala Schira Jonila por sostegní söa aziun a ben de na festa dai mituns tl'Africa Zentrala.